

摘藻堂四庫全書薈要

史部

欽定四庫全書薈要

史部

硃批諭旨卷四十五下

詳校官編修臣繆晉

欽定四庫全書薈要卷七千九百三十七

史部

硃批諭旨卷四十五下

硃批沈廷正奏摺

雍正七年正月十六日雲南巡撫臣沈廷正謹

奏為奏

聞事竊臣於上年十二月內因撫臣張廣泗寄書云丹
江事務既竣定於正月初間旋省之後再赴黎平
料理臣隨將應否移交印信前赴雲南新任緣由



寫書請教督臣鄂爾泰嗣准覆稱新任既到送印
自屬正理等語臣又准撫臣張廣泗咨稱於正月
十七日抵省到任是以臣將印信等項於正月十
六日照例委員齎送撫臣張廣泗接受任事臣即
於十七日起程前赴雲南巡撫新任除另疏
題報外謹繕摺奏

聞至於臣在署貴州巡撫任內事無鉅細俱皆請教督
臣鄂爾泰商酌辦理所有現在檄飭司道查議未

經完結各緊要案件今臣起程赴滇俱已備文咨
明撫臣張廣泗酌議辦理矣理合一併陳明謹

奏

爾署理黔撫一任頗稱盡職可謂不玷委任勉之勉之
身膺封疆重寄於地方無事時自當謹守倘遇有應行
料理處須將智識局量再加擴充遠大庶免狹隘之疵
此又在汝甯已量力而為非朕所能強者張廣泗雖經
擢授今職朕尚未與謀面爾觀其人以為如何

同日又

奏為恭報大捷仰祈

睿鑒事竊臣前因擒勦四川雷波土司楊明義一案有
領兵叅將哈元生等在川省交界地方堵截於撤
師之時被阿驢部落蠻賊拒敵官兵臣隨委員辦
運糧務及督臣鄂爾泰遣兵進勦緣由繕摺奏
聞今於本年正月十二日據雲南元江協副將哈元生
報稱所有阿驢者呢等犯前經就縛而賊首拉金

父子四人並家屬已於十二月二十四日拏獲奉
鶴麗鎮張總兵諭令撤師隨於二十七日帶領官
兵起程回營等情臣伏思我

皇上天威遠播至仁廣被是以各路猥苗悉皆蕩平使
姦頑頓除善良歸化凡屬臣民共享

聖世昇平之福於無既矣謹將大捷緣由繕摺奏

聞謹

奏

朕於凡事非有奇謀異策惟虛心順理仰承

天地神明之錫佑並我

皇考之垂庇耳然每有所指授俱幸成功即此推之汝等
封疆大吏但能以忠誠之心對越

上天未有不邀福之理何必皇皇為一身榮辱利害計耶
鄂爾泰實能如此當竭力效法之

雍正七年二月十九日雲南巡撫臣沈廷正謹

奏為奏

聞事竊臣仰蒙

皇上天恩調補雲南巡撫已於本年二月初一日抵任
所有一切地方事務臣俱請教督臣鄂爾泰而鄂
爾泰公忠為念無不開誠指示且精神甚好娓娓
不倦臣受益良多茲督臣因有盤查貴州藩庫并
經理苗疆及廣西地方事宜於二月十八日起程
前往貴州矣臣膺斯重任惟有遵守督臣鄂爾泰
良規夙夜黽勉以圖上報

聖恩於萬一耳再查滇省地方上年收成頗獲豐稔今
值東作方興於二月初九日得雨二十四日舉行
耕耤後又得雨澤二十七日夜間得雨霑足豆麥
可望豐收此皆我

皇上誠敬昭格宵旰勤求是以邊末遐方均蒙

聖澤臣謹繕摺奏

聞謹

奏

所奏知道了

能自知是一庸平材質在已常思勤以補拙事上惟務
不欺不隱庶可循分供職非朕獨私於汝而過任之督
撫中似汝不勝任者尚不可枚舉人為才限亦屬無可
如何之事若更行不符言少涉欺隱則常賚博爾多傳
鼐等皆可為前車之戒如能效法鄂爾泰十分之一即
一生用之不盡但恐器小不能大受是在汝之自勉自
進也

雍正七年五月二十一日雲南巡撫臣沈廷正謹
奏為奏

聞事竊據大理府城守營遊擊姜忠臣稟稱有本營兵
丁金貴於本年三月十六日在街場拾得銀五兩
不肯挾歸守候失銀之人尋認隨有賣鐵鍋之趙
忠福因失銀呼號金貴查詢明確當將原銀交還
不受謝禮又據威遠同知章元佐詳報有陝西人
馬伯倫王國輔江西人蕭五同至威遠地方於本

年三月十九日用朦汗藥將江西客商蕭維先叔姪迷昏攫取銀兩旋即盤獲一案有威遠賣煙小販彭士奇於三月二十六日在獲賊處所拾得銀一包計六十兩赴該同知衙門投繳查係馬伯倫遺失贓銀士奇並無絲毫隱匿等情臣查兵卒農民拾金不取克敦廉節此實

聖朝教化遠被是以各省尚義之事接踵而見隨寫書通知督臣鄂爾泰去後今覆稱前有廣南兵丁李

應芳拾得生員羅國榮聘銀交還却謝據報即行
獎賞以偶見一事尚未具

奏今大理營兵金貴不取遺金威遠煙販彭士奇拾
贓投繳遠方兵民尚義輕財實皆

聖德感孚所致除獎賞外理應一併奏

聞等語臣謹據實奏達

聖聰伏祈

睿鑒謹

奏

據鄂爾泰奏聞已有旨矣

同日又

奏為奏

聞事竊查滇南各屬麥豆收成臣據布政使張允
隨詳報前來據開昆明嵩明尋甸阿迷通海定邊
等州縣二麥收成有十分并有倍收之處蠶豆俱
收成十分又宜良南寧新興永平雲龍鎮沅等府

州縣二麥收成有十分蠶豆收成九分其餘各屬
二麥收成亦俱有十分蠶豆收成俱有八九分不
等更喜五月十一日起至十九日連得透雨民間
栽插滋培均屬有賴惟據曲靖府屬陸涼州具報
有馬廠一處於四月十六日因上流河水泛漲將
麥穗淹浸等情臣隨委曲靖府知府劉斌馳赴確
勘情形并令查有實在貧民酌給倉穀加意撫恤
去後茲據回稱馬廠田地通計三百餘頃向係牧

馬之所其地勢最低每值收麥後至五六月間凡
曲靖所屬霑益馬龍等州河水泛漲悉皆滙歸馬
廠今歲因有閏月節氣稍遲麥穗尚未收穫忽於
四月間發水致淹田地二百三十七頃有零尚有
未淹田地一百餘頃俱獲十分豐收在被淹小民
咸稱馬廠田畝甫經承認耕種

題報輸糧今既被淹無從辦納惟求免徵本年糧銀
不敢具領倉穀等情臣查陸涼州馬廠田畝百姓

承種方新偶值淹浸糧無所出是以籲懇免徵本年糧銀實係小民下情臣仰體

皇上惠愛邊黎至意隨同在省司道商酌若照分數具題蠲免無幾可否

恩施格外將馬廠被淹田地應輸本年糧折銀一千餘兩免其徵收在於藩庫備公存剩銀內撥補完項其未淹田地應完糧銀仍令百姓照數輸納毋許冒濫請免是新陞糧銀既已有項可補而承種馬

廠小民咸得沾沐

聖澤且通省豐收惟一馬廠被淹又可免於

題達臣業經寫書請教督臣如鄂爾泰以臣所議為
是當即一面另摺奏

聞一面照此辦理如必須將被淹分數

題報臣亦即會疏具

題為此謹

奏

當日正因地非沃壤所以作為馬厰也照汝所請料理
無庸會疏題報

同日又

奏為恭繳

硃批仰祈

睿鑒事竊臣前在署貴州巡撫任內聞撫臣張廣泗自

軍前抵省臣應否赴雲南新任緣由繕摺具

奏奉有

硃批又奏請另建黔省

龍神專祠緣由一摺奉有

硃批臣跪讀之下不啻躬聆

聖訓感深肌髓至督臣鄂爾泰之學問識見迥非尋常

可比此實上有

亦有昧知人之明而誤用者指不勝屈覽汝此奏殊增
聖主之知人善任斯下有督臣之效力宣猷也臣在貴
慚愧

州署任及抵滇以來事無鉅細俱請教督臣鄂爾

泰而鄂爾泰無不條分縷析向臣說知今鄂爾泰

雖暫往黔省臣亦事事寫書請教均承詳細指示
臣得遵循辦理但自揣器小才庸惟有犬馬愚誠
時時對越

聖主竭力效法督臣鄂爾泰之居心勉圖報效以仰酬
我

皇上造就微臣之

洪恩於萬一耳所有黔省另建

龍神專祠臣欽奉

硃批隨通知督臣鄂爾泰并寫書與貴州撫臣張廣泗
遵照辦理矣敬將奉到

硃批原摺恭繳謹

奏

勉為之母令朕抱誤用之慙也

雍正七年六月十八日雲南巡撫臣沈廷正謹
奏為恭逢

盛世嘉徵日華與慶雲並耀事竊照雲南省城於本年

六月初十日巳午未三時日光炳耀五彩繽紛更有慶雲捧護山川城郭映照輝煌隨據司道府縣紛紛稟報前來臣登署中平臺仰視不勝抃舞欣慶而十二日巳午二時又復呈現與初十日煥麗無異實屬千載難覩之嘉徵亘古罕見之祥瑞臣叨任邊方恭逢

上吉雖

聖主不言瑞應但臣等既有所見何敢不敬陳

黼座除寫書通知督臣鄂爾泰外謹據實奏
聞并繪圖恭呈

御覽再應否與督臣會疏具

題伏乞

皇上批示遵行合併

奏明謹

奏

於鄂爾泰奏摺內已批有諭旨矣

同日又

奏為奏

聞事竊本年五月二十八日臣據曲靖府知府劉斌詳

據南寧縣報稱五月二十一日夜間天降大雨山
內起蛟發水以致東北二鄉衝決圍堤四十餘圩
秧苗被淹近堤房屋亦有倒塌人民幸無損傷等
情臣因督臣現在黔省一面寫書通知一面批令
布政司飭委澂江府知府王鐸星馳前往率同該

縣親履查勘并動給司庫備公銀五百兩及常平
倉穀令將實在被淹小民酌量輕重分別賑恤去
後又據南寧縣稟稱東北二鄉地勢原屬低窪今
被淹之田約有一萬餘畝倒塌民房約有二百餘
間幸天色晴霽水漸消退高阜田禾尚屬有望等
語臣查該縣所報偶值起蛟發水其是否成災雖
尚未據該委員確勘造冊具詳但被淹田畝係久
經輸糧老田是以臣會同督臣鄂爾泰先將被水

情形照例

題報俟勘明果否成災再行

題明謹

奏

查明被水情形加意撫恤題本亦經到部矣

雍正七年七月二十九日雲南巡撫臣沈廷正謹

奏為

聖朝恩威遠播遐方慕義輸誠恭摺奏

聞仰祈

睿鑒事竊臣據元江府知府遲維璽報稱臨元鎮邱總
兵自思茅地方寄書云接到老撾國南掌那管島
孫緬文內云

天朝皇帝聖明風調雨順南掌沾恩特遣使貢象二隻
乞轉達等語臣查老撾國即古之越裳氏自成周
朝貢以後歷數千年史不多見茲不煩兵威不煩
招致一旦聞風慕義恭進方物此實我

皇上德威遠播超邁百王是以使從未歸誠之遠域梯
航重譯効順

王朝也臣敬體

聖主加惠遠人懷柔萬國至意即與布政使張允隨商
議動支公項銀兩酌備紬緞布疋委令知府遲維
璽齎往思茅交鎮臣邱名揚從優賞賚并令遲維
璽攜帶供給銀兩沿途加意料理照例伴送使臣
來省臣已將此情由寄書黔省通知督臣鄂爾泰

去後正在繕摺間今又接鎮臣邱名揚來札云該國所貢二象因途中水土不服行至關坪等處相繼病斃使臣甚為惶懼但其誠既著其物原可不問且牙骨猶存表文具在仍即遣員慰賚伴送來省等語臣復又通知督臣俟使臣到省之日統聽督臣會疏

題報外理合繕摺奏

聞謹

奏

覽

鄂爾泰亦經奏聞矣

同日又

奏為奏

聞事竊臣前因曲靖府屬南寧縣東北二鄉偶值起蛟
發水田畝被淹業將委員查勘緣由繕摺奏

聞并將情形

題報在案茲據布政司詳據委員激江府知府王鐸等將勘明被淹田畝分數造冊具結請

題蠲免前來臣現在與督臣鄂爾泰會疏具

題外再滇省今歲入夏以來雨水過多據晉寧宜良

呈貢富民新平等州縣并楚雄府陸續稟報六月

二十五六及七月初一二等日各該地方連值暴

雨河水驟發近河田畝間有被淹等情臣隨批令

司道委員確查并通知督臣去後即於七月初三

日設壇祈禱幸賴

聖主精誠默孚上格

穹蒼晴光即行呈現雨水漸稀至初六日雲開日朗天氣
大晴據楚雄等各該府州縣報稱數日之內積水
盡消田禾並無妨礙等情到臣伏思滇省地處高
阜山田十居七八故從來雨水畧少即不能遍施
栽插今歲高低田畝悉行播種雖窪下之區偶有
被淹然亦旋即消退惟南寧東北二鄉地勢最低

積水不能盡消其餘各屬早稻業已結穗晚稻現在吐花雜糧亦皆葱鬱而元江鎮沅兩府因天氣較別屬炎熱故早稻現已豐收合併據實奏

聞謹

奏

鄂爾泰暫離滇境地方上即疊報小災斯豈無因而至歟汝若不知愧懼則非具人心者矣似此徵應之理昭如影響朕實為之凜然汝等受封疆之重寄內省二字

當時刻勿釋懷抱

同日又

奏為奏

聞事本年七月二十八日據大理府城守營遊擊姜忠臣稟報大理城內於七月十四日戌時起至十七日連次地動趙州城內亦於十六日亥時地動兩處城堞哨房及素有欹斜之居民房屋倒塌數處并損傷大小婦女二口等情又據永昌道及大理

府趙州各稟報地動日期俱與遊擊姜忠臣所稟相同臣隨批司委員確勘情形並動支司庫備公銀兩將倒塌房屋損傷人口之處照例賑恤在案又接得提臣張耀祖來札云自七月十四日至十七日偶然地震即與永昌道設壇齋戒祈禱十八日至二十一日遂安靜寧謐不復震動等語臣伏思滇省四境皆山無通江大河以洩地氣故父老人等咸稱地震之事歷來恒有且今地動非雍正

二年地震可比除寫書通知督臣鄂爾泰併俟委員勘明覆到之日另行

奏報外理合據實奏

聞謹

奏

值茲

上天垂示災異毫無愧懼不知修省乃謂為恒有之事汝若似此無忌憚居心必至不克有終將朕此諭謹誌勿

忘若不痛自刺責盡消鄙陋存一分不信不畏之心則增一分自障自礙也試體驗看

同日又

奏為恭繳

硃批仰祈

睿鑒事竊臣前奏自貴州起程抵雲南巡撫新任日期并雨水情形一摺恭奉

硃批訓勉以常賚博爾多傳鼎為前車之戒如能效法

鄂爾泰十分之一即一生用之不盡欽此伏念臣賦質庸愚才識淺薄屢蒙

皇上諄切教誨勉其不及策其將來臣心非木石寧不自知是以抵滇以來早夜黽勉時深恐懼今復蒙皇上硃批垂誠言言金石切中臣弊臣敬遵

寶訓刻骨銘心惟有矢竭愚誠效法督臣鄂爾泰之一以仰酬我

聖主教誨之洪恩耳所有奉到

硃批理合恭繳謹

奏

竭力倣效之其或庶幾耳

同日又

奏為恭繳

硃批仰祈

睿鑒事竊臣前因官兵擒獲阿驢部落賊首隨將大捷
撤師緣由繕摺奏

聞奉到

硃批伏惟我

皇上宵旰靡遑念念感孚

天地勵精圖治事事推本

聖祖是以

天眷彌隆遠邁千古臣謬任封疆雖才識庸陋未能仰報

涓埃而忠

君親上之大義臣實勗諸寤寐勵諸終身茲蒙

聖諭臣跪讀之下倍深感惕惟有勉力效法督臣鄂爾
泰矢竭丹衷以圖報

聖主屢次教誨之恩於萬一耳謹將原奉

硃批恭繳謹

奏

朕非好為是頻頻訓諭也所諭者又無非此數語然朕
之所以不憚煩者蓋恐下愚不移之質漸摩匪易而人
情又每於熟處難忘故於汝時加提撕儆覺耳倘能觸

目動心努力向是處立定脚根則汝之福祉未艾而於
朕用人顏面亦有光也勉之但捨己之短法人之長甚
屬難事莫作容易看

雍正七年八月二十日雲南巡撫臣沈廷正謹

奏為恭繳

硃批仰祈

睿鑒事竊臣前奏恭繳

硃批摺內奉到

硃批朕亦有昧知人之明而誤用者指不勝屈覽汝此
奏硃增慚愧欽此仰惟我

皇上聖明天縱行政用人超軼前古是以小廉大法吏
治澄清即有改易操行不實心奉職者乃其自甘
暴棄而於

聖主知人之指無與也臣伏讀

硃批自揣不勝惶悚所幸督臣鄂爾泰學問深邃才識
超羣諸凡地方事宜臣無分鉅細逐一請教承督

臣開誠指示婉轉周詳臣又見其開闢苗疆撫綏
軍民諸務人皆視為艱鉅難能者而督臣調度得
宜速奏厥功使從來頑梗之苗民俱輸誠納賦樂
附版圖此實古名臣中所罕見者至其肅清吏治
此等勲績人皆可能非名臣中所罕見之事無如諸臣
惠愛民生寬嚴各得其當於小心謹慎之中具見
工不肯盡力為之耳
公忠體

國之誠皆我

有鄂爾泰其人朕則易知即能善任如汝等輩朕亦易
皇上教育陶鑄知人善任之明鑒也臣仰沐

殊恩畀任滇南獲與督臣朝夕同事得領教益凡素日

知但不可謂之善任耳奈何

鄙陋拘泥之見漸覺開豁但將已之態度一語寫

出如畫

現在勉竭駑鈍效法督臣十分之一以圖報効更

求

皇上此可不必但將鄂爾泰所勸導語中約取一二句心悅於批發督臣鄂爾泰奏摺時再令其悉心教導微

誠服臣記誦砥礪則畢生用之不盡矣臣俾臣日有進益造就成材則感戴

聖慈於無既矣所有奉到

硃批理合恭繳謹

奏

覽

雍正七年十一月初七日雲南巡撫臣沈廷正謹
奏為奏

聞事竊滇省自本年六月十五日以前日華慶雲瑞應
俱經督臣鄂爾泰同臣會疏

題達嗣據布政司詳報烏蒙府於十月初九日擇吉
營建

萬壽亭闔郡文武兵民仰見日麗中天彩雲捧護歷午
未申三時至初十十一兩日更覺光華倍常新闢
苗疆見此慶雲莫不歡欣踴躍感頌

皇仁又臨安府屬之新平縣於九月二十八日皎日當
空旁繞五色慶雲經卯辰巳三時等情到臣臣已
據詳會同督臣現在恭疏具

題外又本年八月內大理武定兩府地方山間俱產
有靈芝閏七月內大理府屬趙州詳報白崖地方

仙女莊蝦蟆口兩處地湧醴泉二股可以灌溉雷
鳴田畝有益民生臣隨批司道會勘去後茲據覆
稱委員勘明仙女莊蝦蟆口兩處相隔二里並出
醴泉且蝦蟆口於具報後九月內泉傷又湧小泉
兩穴匯入大泉分流浥注惠及七村等情臣謹按
書史昔時雖有醴泉未必有益民生可濟農功今
所湧醴泉實為從來未有之上瑞要皆我

皇上宵旰精勤至誠昭格是以

天不愛道

地不愛寶瑞應頻仍萬姓蒙福黃童白叟無不踴躍稱慶

頌戴

皇恩臣身任封疆屢蒙

皇上提撕敝誠遇此嘉徵疊見惟有益加敬謹勉盡厥職以圖涓埃之報於萬一耳除會同督臣鄂爾泰恭疏

題報外理合一併奏

聞謹

奏

滇省此數種祥瑞與爾毫無交涉實係鄂爾泰忠誠感
格之徵應朕亦不居也莫存無恥之念

同日又

奏為恭繳

硃批仰祈

睿鑒事竊臣前因南寧縣起蛟發水被淹田畝照例

題蠲又因滇省今歲入夏以來雨水過多晉寧宜良等州縣近河田畝間有被淹隨繕摺奏達

聖聰今奉到

硃批臣伏念

天人感格之理昭然不爽督臣鄂爾泰公忠體

國克著勲猷是以滇省數年來時和年豐兆民樂業今歲督臣因公赴黔暫離滇省即蒙

上天垂示小災實臣敷政不能上格

蒼穹所致故前於祈禱之時夙夜惶懼痛自刻責茲復蒙
皇上諄諄告誡臣雖愚鈍若不更加敬畏時刻自省則
固犬馬之不若也所有微臣謹遵

聖訓銘勒情由理合繕摺奏

聞併繳

硃批謹

奏

魯論云君子有三畏可見畏之一念時刻不可去懷果

能如此日久無間

上天神明自有照鑒為人為臣之道畢矣

同日

奏為奏

聞事竊臣前准戶部咨文欽奉

諭旨各省地方每銀一兩止許換大制錢一千文不得過一千文之外等因欽此臣伏查滇省出產銅鉛設爐鼓鑄且將鑄出錢文運送他省易銀歸本原與

別省不同故向來錢價每銀一兩換大制錢一千五百有零及一千四百餘文不等不惟官運無虧本之虞即民間日逐零星使用購買薪米食物等項亦稱利便昨部文到時臣恐市肆貿易價值不能即隨錢價低昂彼時督臣鄂爾泰因公在黔臣正與布政使張允隨商酌間適督臣亦寄札藩司囑令因地權宜暫緩出示臣又寫書請教督臣覆稱滇省廠有銅鉛開局鼓鑄原與他省不同等語

及督臣回滇臣復面為斟酌督臣云現在民間錢價已經漸次昂貴今且暫緩出示將來自然歸到每兩一千之數既得上遵

諭旨又可下便民情因地制宜似為妥協緣事關錢法理合據實奏

聞謹

奏

朕諭蓋為直省通盤大局而發也其間斟酌損益全在

汝等因地制宜而時措之此事若依汝庸愚之見自必
但以遵旨為然拘直作曲削方為圓勉強驅迫以圖集
事而時勢之經權民情之便否概置不論矣朕之所以
信重鄂爾泰田文鏡李衛者正在此等處百凡但聽督
臣指示而行未有不合朕意之理較汝等庸才迎合之
道迥異似此以一是字求合故羣工胥莫能及三臣之
秉公順理不事迎合所謂能盡恭順之大者也其勉力
則而效之

同日又

奏為恭繳

硃批仰祈

睿鑒事竊臣前奏恭繳

硃批一摺奉有

皇上訓諭伏念臣以駑駘下質蒙

聖主頻賜教誨期望成材又

諭臣竭力效法督臣鄂爾泰俾有進益臣每念

高厚隆恩不勝感激涕零至捨已之短法人之長誠如

聖諭實為難事以督臣鄂爾泰之學問經濟臣雖竭力

效法欲得其十分之一尤非容易是以臣不但事

無鉅細請教督臣且復再四懇請督臣將臣素日

弊病指出規誡以便改勉而督臣見臣誠懇諸凡

似汝庸材仍未解鄂爾泰同任封疆不便直言之意朕

姑以數語譬曉之令汝明悉如鄂爾泰乃係為國家做

官沈心所以覺得有一沾字若能去此沾字再加開濶

則辦事無不妥協而臣聞言自揣切中臣弊因思

也根本處見未透枝葉邊縱千萬言亦諱不備汝自言前蒙

切中汝弊猶屬醉鄉說夢不但未解鄂爾泰之意即朕

硃批諭旨令臣將智識局量再加擴充遠大庶免狹隘

訓汝局淺量狹之意亦未能領會也誠欲力改弊病惟

務本毋逐末而已

聖言至明至當臣銘刻肺腑知今日督臣之言誠上合

我

皇上之訓旨也惟是臣自問何人蒙

皇上屢次諄切教導即寤寐飲食實多感愧臣雖至愚

至鈍寧不觸目警心益加努力向是處立脚以期

無負我

皇上生成造就之恩於萬一所有奉到

硃批理合恭繳謹

奏

朕拭目以觀汝之勉勵也

同日又

奏為恭繹

聖訓微臣愧悚難名敬繳

硃批仰祈

睿鑒事竊臣前因大理府城并趙州城內於七月間地

動隨繕摺奏

聞奉有

硃批臣當即免冠叩首惶悚愧悔流涕自責望

闕謝

恩伏念臣蒙

皇上天恩拔置巡撫身膺重寄不能上感

天庥以致大理府并趙州兩處地動臣初接該府州稟報
五內凜惕戰懼恐惶日夜引咎自省以冀感格

蒼穹乃繕摺之時未曾將臣愚悃寫入竟將滇省俗傳以
地震之事為歷來恒有等語繕寫摺內罪實難逭
今蒙

皇上諄諄教誨提撕警覺臣惟有謹誌

聖訓不敢以無忌憚居心痛自刺責益加信畏以仰副
我

皇上教誨成全之恩於萬一耳合將原奉

硃批恭繳謹

奏

從來小人但知畏威畏害畏貧而已此外則恬然不以
為意不如是聖人何以言小人而無忌憚耶正為其不
當畏而畏當畏而反不知畏也

雍正八年三月二十一日雲南巡撫臣沈廷正謹
奏為恭繳

硃批仰祈

睿鑒事雍正七年十一月二十日臣齎摺家人回滇恭

捧

皇上硃批原摺六扣臣叩頭跪誦仰蒙我

聖主萬幾之餘訓誨微臣叮嚀剴切臣受此

殊恩彌深感悚雖肝腦塗地難答

高深惟有欽遵

聖諭將督臣鄂爾泰教導之語實力勉勵俾愚陋漸開

稍竭犬馬之報於萬一耳敬將奉到

硃批原摺六扣恭繳謹

奏

實力勉勵與否在汝捫心自懺仰

天不愧耳

同日又

奏為恭繳

硃批仰祈

睿鑒事竊臣前奏滇省疊次瑞應一摺奉有

硃批又奏滇省錢法事宜一摺奉有

硃批伏念臣賦質愚蒙見理未能圓通遇事遂多遲鈍
非遲鈍也總為私心蒙蔽所致耳

此所以遠不及鄂爾泰田文鏡李衛三臣能盡恭
順之大也茲蒙

皇上天恩訓誨周詳令臣效法三臣臣得恍然覺悟有
恐未必然

所遵循此誠從古以來之君上未有如此開導臣
子者臣何幸而得遭逢

聖主且與督臣鄂爾泰同事一方朝夕相晤臣惟有夙
夜孜孜效法督臣鄂爾泰以竭盡犬馬之微誠耳
至滇省嘉徵疊見實係

皇上誠敬感召所致且

簡任總督臣鄂爾泰節制三省公忠宣力故祥瑞屢昭

雖

朕與鄂爾泰非故為不居乃真實不居至如汝不居而
皇上謙抑不居而勲猷如鄂爾泰平日與臣言及亦惟
居居何堪居所以小人兩頭不著一無成就也但當勉
推崇

求諸本何必徒掉空文聖德不敢稍有幾微自居之心臣何人斯敢萌希冀乃

蒙

皇上格外提撕戒臣莫存無恥之念臣跪誦感激惟有
時時敬畏益加惕厲凡事請教督臣鄂爾泰指示
而行以上酬

高厚生成之恩於萬一耳理合將原摺

硃批恭繳謹

奏

覽

同日又

奏為恭繳

硃批仰祈

睿鑒事竊臣前恭繳

硃批奏摺三扣內奉

硃批從來小人但知畏威畏害畏貧而已此外則恬然
不以為意不如是聖人何以言小人而無忌憚耶正

為其不當畏而畏當畏而反不知畏也又蒙

硃批魯論云君子有三畏可見畏之一念時刻不可去
懷果能如此日久無間

上天神明自有照鑒為人為臣之道畢矣又蒙

硃批似汝庸才仍未解鄂爾泰同任封疆不便直言之
意朕姑以數語譬曉之令汝明悉如鄂爾泰乃係為
國家做官沈廷正係為沈廷正做官此所以二人有
霄壤之分也根本處見未透枝葉邊縱千萬言亦講

不備汝自言切中汝弊猶屬醉鄉說夢不但未解鄂爾泰之意即朕訓汝局淺量狹之意亦未能領會也誠欲力改弊病惟務本毋逐末而已又蒙

硃批朕拭目以觀汝之勉勵也欽此臣恭繹

將朕數次訓汝之諭皆令鄂爾泰知之聖訓小人非全無所畏但不當畏而畏之仍是小人之

無忌憚與三畏之君子迥然霄壤大哉

王言闡前聖之精微發先儒之未及誠足為萬世之謨訓矣臣雖至愚極鈍自當慎擇其所當畏者時刻

提撕以仰副我

皇上懇切垂誠之至意臣上不能體

聖主之訓下不能喻督臣鄂爾泰之意自是臣賦質愚昧理會不到所致今蒙

皇上諄諄開導又復直截提撕指點根源跪誦再三感激流涕臣惟有竭盡愚誠夙夜敬畏以仰報高厚於萬一耳所有原奉

硃批理合繕摺恭繳謹

奏

諄諄言之不啻舌敝唇乾若猶不能領會而無憤悱之心則為木石之無知洵非人類矣

同日又

奏為恭謝

天恩事竊臣因原任陝西延安府任內有鄜州革職知州高怡等各任內私借倉糧一案未經查出經部議革職奉

旨從寬降三級留任臣跪讀之下感激涕零愧悚靡涯
隨恭設香案望

闕叩頭具本奏

謝外伏念臣一介庸愚過愆叢積寸長未效屢蒙

皇上逾格隆恩正在惶愧恐懼寤寐難安茲復荷

恩綸寬宥臣益覺慚感交集此生即捐糜頂踵亦不足

上酬

高厚之恩惟有夙夜冰兢圖贖前愆恪遵

諭旨愈加勉勵以仰報

皇上生成之恩於萬一耳臣不勝激切惶恐之至謹繕
摺恭謝

天恩伏祈

睿鑒謹

奏

玷職之羞至於再三不特汝懷慚惡朕亦代汝愧之

同日又

奏為保舉事前欽奉

上諭外官所轄之現任佐貳雜職等屬員亦准其保薦
等因仰見我

皇上因材器使慎選庶職臣至滇省以來凡末僚進見

亦必加意體察延訪庶務以觀其才具見烏蒙府

經歷金言人頗明白辦事勤慎可勝州縣之任臣

於上年即與督臣鄂爾泰會商據鄂爾泰亦云金

言前任晉寧州吏目時奉職勤敏調陞今職在烏

蒙辦事努力洵堪保舉之員臣彼時因金言現委
運制錢前往廣西俟其回滇之日再為保送今金
言已經回任正在保送間適接部文奉

上諭著將各保一人之例停止欽此臣不敢越例保送
但臣見金言能勝州縣之任亦何敢不據實奏

聞以仰副

皇上愛惜人才之至意倘蒙

恩准引

見臣即給咨令其赴部伏祈

皇上睿鑒批示遵行謹

奏

准爾保送即援此旨咨明該部可也

同日又

奏為仰蒙

聖恩垂訓感激難名敬抒下悃伏祈

睿鑒事本年三月十九日督臣鄂爾泰將前在桂林接

到爾泰陳明鹽務廠局事件應聽撫臣沈廷正總理摺內欽奉

硃批沈廷正操守甚不可信卿酌量之回滇時將朕諭令沈廷正知之欽此臣跪聆之下惶悚無地感激涕零當即叩頭謝

恩竊念臣一介微末素蒙

聖恩連年過愆尚可恕若一生過愆則不可姑容矣最養知臣最深且臣連年過愆叢積屢蒙

皇上特賜寬宥

諭旨教誡開導諄切靡所不至若猶不能恪守清操稍萌不肖之念則實無以自列於人類茲復蒙

皇上令督臣鄂爾泰轉傳

諭旨臣惟有益加勉勵砥礪廉隅以期無負

皇上教育之洪恩於萬一耳所有督臣轉傳

諭旨緣由理合繕摺恭

奏伏乞

睿鑒謹

奏

但當痛加洗滌勵心砥行空言無益也

雍正八年五月二十四日雲南巡撫臣沈廷正謹
奏為恭謝

天恩事竊臣因前任福建布政司任內將存庫銀內通
融預給兵餉雖循例借動詳明督撫現今陸續解
補還項但造送雍正五年季報冊內失於分析聲
明疎忽之咎實所難辭茲經部議革職奉

旨沈廷正從寬免草職著降二級留任臣跪讀之下感激流涕隨恭設香案望

闕叩頭具本奏

謝外竊念臣以庸愚下質歷任過愆叢多屢蒙

皇上逾格隆恩予以寬典正在捫心惶恐無地自容茲復蒙

恩綸寬免許令自新臣益覺慚感交集

恩重身輕惟有朝夕儆惕愈加奮勵以仰報

高厚生成之恩於萬一耳臣不勝激切愧感之至敬繕
摺恭謝

天恩謹

奏

朕實代汝愧之倘仍不知恥誠可謂下愚不移者矣自
此以後若不革面革心改絃易轍現在雖獲僥倖終至
不能保全也勉之慎之

雍正八年十月二十四日山東河南河道總督臣

沈廷正謹

奏為恭請

陞見仰祈

俞允以抒下悃事竊臣於本年十月二十日接准部咨

欽奉

上諭雲南巡撫沈廷正著補授山東河南河道總督欽

此臣聞

命自天感悚無地當即恭設香案望

闕叩頭具本奏

謝外伏念臣於雍正四年蒙

恩擢授福建布政使得以仰觀

天顏之後迄今四載有餘依戀愚誠時縈寤寐原擬今
歲之冬恭請

陛見稍抒微悃今又荷

聖恩補授山東河南河道總督則微臣之趨赴

闕廷瞻仰

雲日更為切近且河道情形及堤工諸務尤關緊要自
必躬親跪領

聖訓指授方能料理妥協伏祈

皇上俯念河務工程關係重大准臣

陞見臣現赴河南恭候

諭旨不勝感激待

命之至謹

奏

應至京見朕然後再赴新任

雍正九年二月初九日山東河南河道總督臣沈
廷正謹

奏為奏

聞事竊臣於本年正月初五日叩覲

天顏荷蒙

皇上訓諭周詳兼念桃汎在邇

命臣速回豫省查勘河工俟督臣田文鏡幾時可以交

印令其具奏臣已於正月二十六日抵豫隨將諭旨向督臣田文鏡宣述并將面奉

皇上交臣帶給督臣田文鏡奏摺一紙交付祇領訖臣即於二十九日起程查勘黃河北岸工程至二月初八日順道進省將勘過工程向督臣田文鏡請教復於初九日由祥符縣南岸程家寨一帶查勘俟勘竣另摺具

奏外臣昨從祥符封邱陽武原武滎澤鄭州中牟等

州縣經過地方見有乏食窮民鳩形鵠面沿路求
乞而村鎮中更有賣鬻男女為山陝客商買去者
每日遇有數起又聞鄉村有糧百餘石之家即為
附近貧民覬覦每於夜間羣相借貸甚至集場街
市竟有將孩童插標出賣並有搶奪食物苟延喘
息之人即省城亦然臣已據目擊情形與督臣詳
細說知督臣遂云從前招回窮民到家之後俱各
給有口糧以資養贍上年歲底又曾捐散過錢七

十餘千而司道以及州縣等官亦有捐散之項現在開倉平糶還令地方官酌量借給至於鄉村窮民乘夜借糧之處洧川縣已有報案賣人之事亦有所聞但未知如此備細何以近日情形一至於此等語臣又云豫省沿河十四州縣除武陟縣高阜田地居多上年被水尚少其餘各屬田地原有高低被水自有重輕未可一槩牽扯而論今既開倉糶借必須擇實在被水乏食窮民與陸續招回

戶口平糶之外再行分別借給并將應完課賦暫
緩差催以息追呼之擾現今麥苗在地若能接濟
兩月口糧俟至二麥成熟小民便獲安全督臣採
聽臣言隨即寫札諭令各屬作速料理至於賣鬻
男女之中保媒人督臣即欲拘拏究處嚴行飭禁
臣思窮民賣人原因一時不能度活暫為保全性
命之計彼此情願若一經追究反無生路只須速
為調劑俾其度日有資自然不禁而止臣謬抒管

見不過就時論事今督臣田文鏡現在籌畫安頓料理必能使被水之民共沾我

皇上浩蕩殊恩也緣事關民瘼理合一併奏

聞謹

奏

覽奏豫省災黎近日情形已悉凡事如此據實不隱朕甚嘉之

雍正九年二月二十七日山東河南河道總督臣

沈廷正謹

奏為奏

聞事竊臣前因豫省沿河各屬被水地方見有乏食窮民接濟無資是以將目擊情形備細向督臣田文鏡說知茲臣於二月二十日查勘黃河工程事竣旋省督臣與臣面言從前乏食窮民不但將沿河被水州縣現在委員確查即此外尚有鄰近州縣乏食小民亦俱飭令一併清查除平糶之外無論

有田地無田地擇其果係實在乏食者每戶按大口小口概借給兩月之糧亦不論將來能還與否以濟其青黃不接凡遠鄉僻壤諄諭各屬實力奉行務使無濫無遺臣見城鄉百姓俱知總督現在委員清查將來不虞乏食且喜近日天氣晴和麥苗長發只須於三月中得雨一次二麥可望收成謹據實奏

聞謹

奏

覽奏朕之憂懷少釋

雍正九年六月初六日山東河南河道總督臣沈
廷正謹

奏為奏明事竊照東省戴村壩工臣兩次親詣詳勘
應將接連滾水壩之新建石壩高出二尺之處先
行拆去恰與舊壩相平與部議適相符合其接連
亂石壩之新壩高於舊壩止有六寸接連玲瓏壩

之新壩高於舊壩一尺三寸若俱拆去二尺尚應
另為補鋪方與舊壩相平但辦石鑿砌大需時日
目今伏汎經臨恐工未竣而水驟至非特徒糜帑
金且汶水傾注不能抵禦關係匪輕况霜降過後
仍應會勘拆修則此接連亂石玲瓏之新壩似應
停其拆砌統於霜降後勘明興工臣赴豫省將此
意商之督臣田文鏡及協理河臣朱藻意見俱各
相符已經會同咨部俟秋汎過後臣再會同朱藻

前往確勘興工另行奏

聞臣因督臣田文鏡現在奉

旨進京調養起程在即所有東豫兩省工程錢糧臣與
田文鏡商定確核凡應

題應咨事件俱經一一會同辦理至禹王臺竹絡壩
工臣前因領帑分築之沂郯海贛同知吳象賢玩
工侵帑業經兩次會叅遴委加河通判蔣祈年前
往署理接修自任事以來勇往急公所修竹絡壩

上下兩層照估剋期築竣現在僨砌邊絡不日完工俟竣工之後應聽江南河臣嵇曾筠會疏

題報惟是沂鄒海贛同知一缺經管兩省工程最為緊要今通判蔣祈年辦事勤敏洵堪膺此要任臣與督臣田文鏡商酌

題請而督臣以蔣祈年係其至戚不便書

題臣思要缺全在得人若以蔣祈年補授沂鄒海贛同知實屬人地相宜臣謹繕摺奏請

聖訓是否可行伏乞

皇上批示以便另疏

題補統祈

睿鑒謹

奏

所請是將蔣祈年具疏題補可也

同日又

奏為奏

聞事竊照濟寧

臣

標設有中左右城守四營而城守一

營獨隸都司統轄則州城內外汛地是其專責必
須整飭營伍加意巡防方為盡職今城守營都司
李懷義怠玩成習諸事廢弛民間遇有失火不惟
不行飛報亦不力為撲救該汛兩次命案至今亦
均未緝報且馭兵無術巡查疎懈似此玩廢劣員
斷難一日姑容除臣現在繕疏

題叅外理合恭摺奏

聞抑臣更有請者濟寧地方為南北水陸通衢其間五
方雜處姦良莫辨最宜嚴謹稽查小心防範是以
城守一營專司州城內外地方而城守官弁俱駐
劄城內查濟寧關廂戶口殷繁商賈雲集若官弁
俱駐城內夜間設有匪竊失火等事憑何擒拏救
護必得專員督率方可綏靜地方據臣愚見似應
於該營內派撥千把總二員巡查南北二關外委
千把總二員分查東西二關俱令酌帶兵丁駐劄

適中緊要之地日則盤查姦宄夜則巡防失火匪
竊偶遇有事一面星飛傳報城內一面救護擒拏
如此則州城內外均有專責聲息相通而遠近地
方民皆安堵永戴

聖恩於無既矣臣為關係地方起見謹陳末議已於疏
內聲明統祈

皇上睿鑒謹

奏

俟題到時有旨

同日又

奏為奏

聞事竊照東省運河堤岸攸關漕艘往來要津必須修理堅固方足以資挽拽而衛民田經前署河臣田文鏡估計

題修仰蒙

俞允發帑興工臣接奉部文隨撥發帑銀檄令道廳等

官遴選幹員上緊募夫分修復親赴各工詳加覆
勘務期帑不虛糜工收實效臣兼至汶上縣所轄
之何家壩查勘壩工情形該壩坐當汶河西岸關
係蓄水濟運衝刷流沙為南北運行之關鍵因建
立年久底樁腐朽欹斜石塊坍塌錯落復經上年
大水其雁翅堤岸又俱潰缺一遇汶水泛漲沙流
入運劉老石頭二口遂致淤墊淺澀此項壩工急
須按照舊制速行修整俾令蓄洩有資臣已飭充

寧道王鴻勳據實確估俟具詳到日即當

題請修築臣伏念黃河工程較運河更為緊要且伏
汎經臨秋汎踵至尤須親督修防隨於五月二十
日由東省曹縣黃河芝麻莊一帶查勘各工俱各
平穩惟豫省儀封縣北岸趙家寨工程坐當全黃
頂衝現今大溜掃灣直射堤根甚為險要臣相度
情形亟宜未雨綢繆當即飛撥料物飭令道廳等
官督率兵夫星夜邁埽加鑲上緊防護一面將需

用工料銀兩估報臣再為酌核興修臣於五月二十五日抵豫省祥符縣程家寨工所看得該工逼近省城最為喫緊上年黃河大溜直趨南岸危險異常前署河臣田文鏡督率搶救平穩近因河溜仍復南趨灘崖日被汕刷是以前署河臣田文鏡會疏

題請於北岸開挖引河導溜北徙以保南岸堤工荷蒙

聖恩俯允業將引河如式挑挖深通正在守候開放間
詎今歲四五兩月以來北風連作全河水勢傾注
南岸頂衝大溜上提下坐不時蟄陷洵屬險工臣

一面嚴飭管河道劉永錫隨同協理河臣朱藻在
工無分晝夜下埽加鑲竭力搶護一面飛檄僱辦
各料并撥運料物以濟急需方保無虞臣復親率
各員加緊修做仍早夜駐宿引河工所一俟水勢
漲發風色順利即相機開放第南岸程家寨險工

十分緊急亟應修做大工據管河道劉永錫估計
臣已另疏會

題外所有臣勘過各處工程情形并搶護修築緣由
敬繕摺奏

聞伏祈

皇上睿鑒謹

奏

目下亢旱恐氣候一轉雨水驟多則在在堪虞亟宜恪

秉誠敬以祈

神佑竭力防護以盡人事也

雍正九年七月初七日山東河南河道總督臣沈
廷正謹

奏為奏

聞事竊照豫省黃河兩岸考城縣顏家支河歷年每遇
汎水長發漫灘進水以致田畝屢被淹浸臣臨工
相度特委濬縣縣丞何祖壽並效力人員協同該

管廳汎分別搶修建埽壩以塞支河築月堤以資
重障其顏家莊迤上陳家莊等處堤工通身幫築
寬厚復又擇緊加鑲保護周密本年四月十四五
六等日河水長至五尺支河並不進水口門漸次
受淤不但大堤得免浸汕而向日淹漫之區盡成
膏腴之產二麥豐登倍加收穫現在秋禾又復茂
盛查顏家莊迤東約長八十餘里約地三千餘頃
每畝收麥多至一石五六斗一石七八斗不等約

計收麥數十萬石沿河數十村民人僉稱從此可
以辦課養家莫不感戴

皇恩而考城一邑亦皆比戶盈寧臣目擊豐登景象實
切欣慶敬繕摺奏

聞謹

奏

覽奏不禁以手加額為豫民稱慶也

同日又

奏為恭報程家寨北岸引河開放南岸工程平穩仰
慰

聖懷事竊照豫省祥符縣南岸程家寨工程為全黃掃
灣之區上年河溜南趨灘崖汕刷是以前署河臣

田文鏡會疏

題請於北岸開挖引河以保南岸堤工臣早晚相機
住守以待風色水汛督率道廳搶鑲南岸下蟄埽
工正在晝夜分任料理間於六月初八日水漸增

長風亦順利臣相其大溜逼近河頭於初九日巳時連底水共長至二尺二寸臣相度機宜當即虔祀

河神趁其溜頭之急藉其風勢之猛率同道廳帶領兵夫併力開挖但見水頭湧注全黃直趨開闢暢達頃刻成河復又乘舟由引河來往探量水勢深通暢流而對岸南逼之溜漸次減緩程家寨埽工俱經蟄實平穩現今南岸漸長淤灘該工可保永

固兩岸老幼鄉民莫不歡呼踴躍感戴
聖恩所有程家寨開放引河緣由理合恭摺

奏報伏祈

睿鑒謹

奏

覽奏引河開通暢流朕懷深為愉悅

同日又

奏為奏明事本年七月初七日據臣標署中軍副將

楊鐸報稱六月三十日濟寧南鄉新店等地方有
蝻子生發離新店南十數里窪地荒草內及牛頭
河地方亦有蝻子數片相隔一里半里不等今營
員及知州等現在率領兵夫撲打等因又據濟寧
州知州張綸呈報前來臣當即飛檄上緊撲滅仍
令不時在於各境巡查撲打并檄委效力員弁前
往協同撲捕務期淨絕根株毋致蔓延兼咨山東
撫臣岳濬轉飭撲捕在案臣思蝻子初出翼翅未

生必須趁時撲淨庶免蔓延第直隸河南山東並江南各屬地方多有臨水低窪之區或有積水乾涸魚子未化日曬生蝻亦未可定伏懇

皇上敕下督撫諸臣轉飭各屬加意查察預為防範以仰副我

皇上軫念民生之至意臣因蝻子關係禾稼不揣冒昧繕摺奏

聞伏祈

睿鑒謹

奏

魚子化生蝗蝻向曾聞之汝即言之各督撫轉飭該屬
預防可也

雍正九年九月初八日山東河南河道總督臣沈
廷正謹

奏為恭報黃河秋汛安瀾工程平穩情形仰慰

聖懷事竊照本年秋汛水勢疊增而黃河險工多在下

游臣往豫省之歸河及東省之黃河各汛細加巡
查適值東省戴家樓黃奶奶廟等處豫省河夫營
蒙牆寺等處積水倒漾浩瀚汪洋臣往來相度督
率道廳等官或搶築子堰或加鑲防風晝夜監催
俱經一律完竣其上游各汛險工臣復嚴飭該管
廳汛貯備料物加謹修防亦俱保固平穩臣仍前
往逐加查驗務使帑不虛糜工收實效查自入秋
以來霖雨時沛黃河日漸增長據寧夏府知府鈕

廷彩連次飛報八月初六日寧夏水長一尺六寸
初八日水長二尺臣隨飛檄該管各官上緊巡邏
預為防範仰賴

聖主至誠感格

神明顯應昭然儀考兩縣地方連開天然引河俾最
險要工得以保固東豫二省河道俱獲安流且自
寧夏報水之後豫省水勢不過微增並無大漲今
霜降在邇汎水日消各工在在鞏固河流永慶安

濶至山東運河水勢現在深通暢流回空糧艘過
行無阻統俟霜降後照例恭疏

題報外理合具摺恭

奏仰慰

聖懷謹

奏

東豫兩省河道俱慶安濶朕以手加額覽焉

硃批諭旨卷四十五下



總校官庶吉士臣侍朝

校對官編修臣莫瞻菴

謄錄監生臣楊可震